

Nunatsinni nukissiuuteqarnikkut niuerneramik ingerlatsiviup, ikummatissanik pilersuivittut ingerlasup pisortanit pigineqartup Polaroil-ip KNI A/S-imit avissaartinneqarluni 1. januar 2015-mit aallartittumik ingerlatseqatigiiffittut ingerlanneqalernissaa siunertaralugu Naalakkersuisut piareersaataasumik sulissuteqaqqullugit peqquneqarnissaannik Inatsisartut aalajangiiffigisassaattut siunnersuut

(Inatsisartunut ilaasortat Knud Kristiansen aamma Gerhardt Petersen)

pillugu

Inuussutissarsiornermut Ataatsimiititaliap

ISUMALIUTISSIISUTAA

Siunnersuutip aappassaaneernejarnerani saqqummiunneqartoq

Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Knud Kristiansen	(A)	siulittaasoq
Inatsisartunut ilaasortaq Ruth Heilmann	(S)	siulittaasup tullia
Inatsisartunut ilaasortaq Saxtorph Didriksen	(S)	
Inatsisartunut ilaasortaq Andreas Uldum	(D)	
Inatsisartunut ilaasortaq Aqqaluaq B. Egede	(IA)	

UPA2014-imi ulloq 14. maj siullermeerinninnerup kingorna ataatsimiititaliap siunnersuut misissorpaa isumaliutigisanilu Inatsisartunut matumuuna nassiullugit.

1. Siunnersuutip imarisaa siunertaalu

Ingerlatseqatigiiffiup Namminersorlutik Oqartussanit pigineqartup KNI A/S-ip ingerlanneqarnerata ersarinnerulernissaa siunnersuuteqartut siunnersuuteqarnermikkut kissaatigaat siunnersuutigalugulu Polaroil ingerlatseqatigiiffimmit avissartinneqassasoq, taamaalilluni Polaroil ingerlatseqatigiiffittut namminersortutut Namminersorlutik Oqartussanit pigineqartutut siunissami ingerlanneqalersinnaaqullugu.

Nunaqarfinni illoqarfinnilu isorliunerusuni nioqqutissanik pilersuinermi paasiuminartumik ersarissumillu ingerlatsinissaagaluaq suliassa qarfiit assigiinngitsut ataatsimut eqiterullugit

ingerlatsisoqarneratigut pinngitsoortinneqartartoq, allaallu nunatta karsianit aallaavilimmik aningaasat amerlanerungaartut inuiaqatigiinni kaaviiartinneqarsinnaagaluernerisa pinngitsoortinneqartarnera aamma aarleqqutigineqarsinnaasoq siunnersuuteqartut naliliipput.

KNI A/S-ip 2012/13-imi naatsorsuutai qimerlooraanni takuneqarsinnaavoq Polaroil 73,1 mio. kr.-inik sinneqartooruteqarsimasoq, taamaattorli KNI A/S-ip ataatsimoortumik naatsorsuutaani takuneqarsinnaalluni akileraarutit sulii ilanngaatinagut ingerlatseqatigiiffik taamaallaat 39,6 mio. kr.-inik sinneqartooruteqarsimasoq, tassa Polaroilip ingerlatseqatigiiffiup sinneranut matussusiisarnerata annertunerujussua tassaniinnaq takuneqarsinnaalluni.

Polaroilip qularnaatsumik sinneqartooruteqarfiusumik ingerlanneqarsinnaanera KNI A/S-ip sinnerata niuerneramik tunngaveqarluni ineriartortinneqarnissaanut kigaallassaataasoq siunnersuuteqartut isumaqarput.

Siunnersuuteqartut erseqqissaatigaat piffissaliinermik allanngortinneqarsinnaanera sillimaffigigitsik. Polaroilip aktiaateqarluni ingerlatseqatigiiffittut nammineq ingerlasutut piareersarluarneqarsimalluni aallartinneqarsinnaanissaa aamma KNI A/S-ip torersumik patajaatsumillu ingerlaqqissinnaanissaa qulakkeerneqareerpat avissaartitsineq ingerlanneqarpat pingaarnerpaavoq.

2. Siunnersuutip Inatsisartunit siullermeerneqarnera

Siunnersuut siullermeerneqarmat pingaartumik Atassummit taparserneqarpoq, partiit allat annertunerusumik misissuisoqassasoq isumaqartut. Siunnersuut itigartinneqassasoq Naalakkersuisunit kaammattuutigineqarpoq aammalu UPA2015-imi Inatsisartunut saqqummiunneqartussamik KNI A/S-ip ataatsimoortumik misissueqqissaarfigineqarnissaa pillugu allannguutissatut siunnersuummik saqqummiussaqlutik.

3. Ataatsimiititaliap siunnersuummik suliarinninnera

Polaroilip KNI A/S-imit avissaartinneqarsinnaanera isummerfigineqannginnerani sammiviit apeqqutillu arlallit, tassunga ilanngullugu pingaartumik suliffeqarfinni taakkunani siunissami aningaasaqarnikkut pissutsit aammalu innuttaasunik pilersuinerup isumannaatsuunissaanut siunissamilu akit qaffasissusissaannut sunniutissat qulaajarneqassasut ataatsimiititaliaq isumaqarpoq.

Tamanna tunngavigalugu KNI A/S pillugu ataatsimut misissueqqissaarnissamut taamaattumut Naalakkersuisut pisariaqartinneqartumik piffissaqartinneqarnissaat isumatusaarnerusoq ataatsimiititaliaq isumaqarpoq. Tamatuma peqatigisaanik taamatut misissueqqissaarneq

ingerlatsivimmit arlaannaannulluunniit attuumassuteqanngitsumit ingerlanneqassasoq ataatsimiititaliaq isumaqarpoq.

Isumaliutigisani tunngavigalugit Naalakkersuisullu namminneq allannguutissatut siunnersuutaat tunngavigalugu allannguutissatut siunnersuut imaattoq ataatsimiititaliamit saqqummiunneqarpoq:

4. Ataatsimiititaliap allannguutissatut siunnersuutaa


Ingerlatsisut arlaannaannulluunniit attuumassuteqanngitsut suleqatigalugit KNI A/S-ip UPA2015-imi saqqummiunneqartussamik ataatsimut misissueqqissaarfigineqarnissaanik Naalakkersuisut peqquneqarput. Misissueqqissaarnerup imarissavaa KNI A/S-ip piginnittutut siunissamut periusissaanut siunnersuut, tassunga ilanngullugu immikkoortut taakku marluk avissaartinneqarneranni iluaqutissat ajoqutissallu saqqummiunneqassallutik.

5. Siunnersuutip aningaasaqarnikkut kingunerisassai

Allannguutissatut siunnersuutip piviusunngortinneqarnerani aningaasaqarnikkut kingunerisassat aningaasaliissutaareersut iluini akilerneqarsinnaasut ataatsimiititaliaq isumaqarpoq.

Allannguutissatut siunnersuut ataatsimiititaliamit saqqummiunneqartoq Inatsisartunit akuerineqassasoq ataatsimiititaliap isumaqatigiittup inassutigaa.

Taama oqaaseqarluni isumaliutissiissumilu oqaatigineqartutut paasinnilluni ataatsimiititaliap siunnersuut aappassaaniigassanngortippaa.




Knud Kristiansen

Siulittaasoq



Ruth Heilmann


Siulittaasup tullia



Saxtorph Didriksen



Andreas Uldum



Aqqaluaq B. Egede